

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. नगरोटा ते बडगाम विधानसभा सीटें लेई उपचुनांs गितै अधिसूचना अज्ज जारी कीती जाहग, राज्यसभा दे चुनांs लेई जम्मू-कश्मीर थमां बीजेपी ते एन.सी दे मेदवार अपने नामांकन दाखल करडन।
2. उपराज्यपाल मनोज सिन्हा होरें पदमश्री डॉ. जितेंद्र उधमपुरी हुंदे पंजाबी कविता संग्रह दा विमोचन कीता, केई शिष्टमंडलें कन्नै लोकहित आहले विषयें पर गल्लबात कीती।
3. खेड्ढ मंत्री सतीश शर्मा होरें जबरवन लेजेंड्स श्रृंखला 2025 तैहत पहली अंतरराष्ट्री माउंटेन बाइकिंग आयोजन च हिस्सा लैता ते इसी जम्मू-कश्मीर च साहसिक खेड्ढें ते सैलसफा गी बढावा देने आहला दस्सेआ।
4. 1 करोड़ रपे पूल ईनाम आहला भारत दा सब्बनै शा बड्डा स्कूल हैकाथान विकसित भारत बिल्डाथान 2025 अज्ज शुरू होआरदा ऐ।
5. बीएसएफ दा आखना ऐ
जे स्याले कोला पैहले बन्ने पारा घुसपैठ दिएं कोशिशें पर रोक लाने लेई बल पूरी चाल्ती सौहगा सतर्क ऐ।

<><><><><><>

By elections Notification

भारती चुनांs आयोग जम्मू-कश्मीर च नगरोटा ते बडगाम विधानसभा हल्कें आस्तै होने आहले उपचुनाएं दे सरबंथै च अज्ज इक अधिसूचना जारी करोग। कार्यक्रम मताबक मतदान 11 नवंबर गी होग ते वोटें दी गिनतरी 14 नवंबर गी कीती जाग। नामांकन जमा करोआने दी अखीरी तरीक 20 अक्टूबर होग ते उंदी जांच 22 अक्टूबर गी रक्खी गेदी ऐ। नगरोटा विधानसभा हल्का भारती जनता पार्टी दे विधायक देवेंद्र सिंह राणा हुंदे निधन मगरा खाली होई गेआ हा, जिसलै के मुखमंत्री उमर अब्दुल्ला होरें गांदरबल विधानसभा सीट बरकरार रखदे होई बडगाम विधानसभा सीट थमां इस्तीफा देई दिता हा।

<><><><><><>

BJP Candidates Nomination

जम्मू-कश्मीर थमां राज्यसभा दिएं सीटें लेई बीजेपी दे त्रै मेदवार सत शर्मा, राकेश महाजन ते डॉ. अली मोहम्मद मीर अज्ज सिविल सचिवालय श्रीनगर च अपने नामांकन दाखल करडन। इस मौके पार्टी दे 28 विधायक ते पार्टी दे सीनियर लीडर बी मजदूद रौहडन। बीजेपी जम्मू-कश्मीर दिएं 4 राज्यसभा सीटें चा 3 पर अपने मेदवार तोहारा करदी ऐ, इस बारै घोशणा अतरू शनिवारें श्रीनगर च लग्गी दी बैठका च लैता गेआ हा। एहदे शा इक रोज पैहले शुक्रवारें नेशनल कांफ्रेंस नै राज्यसभा चुनांs लेई अपने त्रै मेदवारें दे नाएं दा ऐलान कीता हा जेड़े अज्ज अपना नामांकन दाखल करडन। चुनांs 24 अक्टूबर गी होना ऐ।

<><><><><><>

LG Book Release

उपराज्यपाल मनोज सिन्हा होरें कल डुग्गर दे नामवर कवि ते लखारी पदमश्री डॉ. जितेंद्र उधमपुर हुंदे पंजाबी कविता संग्रह “मेले पतनां दे” दा विमोचन कीता। राजभवन जम्मू च आयोजित कताब विमोचन समारोह दरान एल.जी होरें डॉ. उधमपुरी होरें गी साहित्य दे क्षेत्र च उन्दे नमुल्ले योगदान दी सराहना कीती। डॉ. जितेंद्र उधमपुरी डोगरी दे अलावा अंग्रेजी, हिंदी, उर्दू ते पंजाबी च बी अपने लेखन दा लोह मनवाई चुके दे न ते पिछले कोई 7 दहाकें थमां साहित्य दे क्षेत्र च योगदान दिंदे आवा करदे न। अपनी कताब बारै आकाशवाणी कन्नै गल्ल करदे होई उनें आखेआ।

<><><><><><>

LG-Delegation

जंदे रोज जम्मू च कई प्रतिनिधिमंडलें लेफ्टिनेंट गवर्नर मनोज सिन्हा हुंदे कन्नै मलाटी कीती ते बक्ख-बक्ख लोक कल्याण ते समाजी पहलकदमियें पर चर्चा कीती। अहिंसा विश्व भारती ते विश्व शांति केंद्र दे संस्थापक आचार्य डॉ. लोकेश मुनी जी होरें इक होर बैठक च उपराज्यपाल होरेंगी शांति, सौहार्द ते अंतर धार्मिक गल्लबात गी बढ़ावा देने दे अपने जत्न दे कन्नो-कन्नी अहिंसा विश्व भारती दे जम्मू-कश्मीर चैप्टर दी स्थापना करने दी अपनी योजना बारै जानकारी दिती। एहदे अलावा भारती जनता पार्टी प्रवक्ता एडवोकेट अंकुर शर्मा ते फ्लोरा नागबनी दियां साबका सरपंच वंदना कुमारी होरें बी उपराज्यपाल हुंदे कन्नै मलाटी कीती।

<><><><><><>

Satish-Gulmarg

युवा सेवाएं ते खेड़ें सरबंधी मंत्री सतीश शर्मा होरें कल गुलमर्ग च आयोजित अंतरराष्ट्री डाउन हिल माउंटेन बाइकिंग चैंपियनशिप, जबरवन लैजेंड श्रृंखला-2025 च शिरकत कीती। जबरवन फाउंडेशन आसेआ आयोजित जम्मू-कश्मीर च करोआया गेदा इस किस्मै दा एह पैहला-पैहला आयोजन हा। मंत्री होरें आयोजन दी सराहना करदे होई सरकार दी तरफा जम्मू-कश्मीर च इस चाल्ली दिएं साहसिक खेड़ गतिविधिं गी बढ़ावा ते हर चाल्ली दा सहयोग ते समर्थन देने दा धेइया फही पक्का कीता। इस माउंटेन बाइकिंग चैंपियनशिप च भारत दे अलावा दुनिया दे बक्ख-बक्ख हिस्सें थमां आए दे बाइकरें हिस्सा लैता। मंत्री होरें प्रतिभागिं कन्नै गलबात कीती ते मगरा मीडिया कन्नै गल्लबात कीती ते मगरा मीडिया कन्नै गल्ल करदे होई उनें आखेआ

<><><><><><>

Viksit Bharat Buildathon

मुख्य दा सब्बनें थमां बड़्डा स्कूल हैकाथान विकसित भारत बिल्डार्थॉन 2025 अज्ज बडलै 10 बजे थमां राती 11 बजे बश्कार आयोजित होग। विकसित भारत बिल्डार्थॉन इक राश्ट्रव्यापी पहल ऐ जेदे च 6मीं थमां 12मीं जमात तगर दे विद्यार्थिं दी रचनात्मकता ते समस्यां दे हल गी तलाशने दे कौशल गी बढ़ावा देने आस्ते स्कूलें ते शिक्षकें गी साद्दा दिता जंदा ऐ। एहदे च विद्यार्थिं गी 4 विशेसार-आत्मनिर्भर भारत, स्वदेशी, मुकामी उत्पादें गी बढ़ावा देने यानि वोक्ल फॉर लोकल ते समृद्ध भारत दे विशे पर अभिनव प्रारूप तैयार करने आस्तै प्रोत्साहित कीता जंदा ऐ। एहदा सरिस्ता शिक्षा मंत्रालय आसेआ अटल नवाचार मिशन ते नीति आयोग दे सहयोग कन्नै कीता जा'रदा ऐ। आधिकारिक पोर्टल vbb.mic.gov.in या schoolinnovationmarathon.org/registration पर इस आयोजन दा सिद्धा प्रसारण होग। एहदे तैहत 1 करोड़ रपे दा पुरस्कार बी रक्खेआ गेदा ऐ जिसी राश्ट्री सतह पर 10 जेतुएं, राज्य सतह पर 100 विजेताएं ते जिला सतह दे 1000 जेतुएं च बंडेआ जाग।

<><><><><><>

BSF-Infiltration (byte)

सीमा सुरक्षा बल नै कश्मीर च स्यालै औने दे चलदे गै सुरक्षा उपाएं गी होर तगड़ा करी दिता ऐ कीजे इस रूतै च घुसपैठ दिएं कोशिशें च बाद्दा होने दी शेंका ऐ। बांदीपुरा च बुल्लर मैराथॉन दे दुए संस्करण च बोलदे होई बी.एस.एफ दे ए.डी.जी सतीश एस खंडारे होरें आखेआ जे खुफिया रिपोर्टें च दस्सेआ गेआ ऐ जे आतंकवाद दी बन्ने पारा लांच प्वाइंटें थमां घुसपैठ दी तैयारी च न। उनें भरोसा दोआया जे कुसै बी घुसपैठ गी रोकने लेई बीएसएफ ते सेना दे जोआन हाई अलर्ट पर न। मीडिया कन्नै गल्लबात करदे होई बीएसएफ दे एडीजी होरें आखेआ

बीएसएफ आसेआ आयोजित इस मैराथॉन च नौजोआनें ते महिलाएं दी बड़ी मती बड़्डी गिनतरी च शमूलियत दिक्खने गी लब्बी। इस द्रौड़ दा मकसद सुरक्षा ते सामुदायिक जुड़ाव च बीएसएफ दी दोहरी भूमिका गी दर्शादे होई सरहदी समुदाएं कन्नै सरबंध मजबूत करना हा।

<><><><><><>

CS-NABARD

मुख्य सचिव अटल डुल्लू होरें जम्मू-कश्मीर च नाबार्ड दे ग्रामीण ढांचा विकास फंड आर.आई.डी.एफ तैहत हासल प्रगति दा जायजा लैने लेई मते इखतयारें आहली कमेटी दी अध्यक्षता कीती। बैठक च मुख्य सचिव होरें इत्थै च लैते गेदिएं परियोजनाएं गी तौले गै मिथे गेदे समें दे अंदर-अंदर मुकम्मल करने दी जरूरतै पर जोर दिता। 2025-26 आहले माली बरे लेई अजें तोड़ी 7 जहार करोड़ रपे दी लागत आहिलयें 1 जहार 426 परियोजनाएं गी मंजूरी थहोई ऐ जेदे चा 36 प्रतिशत दी रकम खर्च कीती जाई चुकी दी ऐ। मीटिंगें च एह जानकारी बी दिती गेई जे नाबार्ड नै 2025-26 लेई 600 करोड़ रपे दी लागत आहिलयें 201 नमीं परियोजनां बी अलाट कीती दियां न। मुख्य सचिव होरें मैहकमे गी आखेआ जे ओह मकाई लैते गेदे कम्में रिपोर्ट जमा करान तां जे होर फंड जारी कीते जाई सकन ते विकास कम्में दा असर जमीनी सतह पर यकीनी बनी सकै।

<><><><><><>

Ramban PMMVY

केंद्र सरकार आसेआ शुरू कीती गेदी प्रधानमंत्री मातृ वंदना योजना दा लाह जम्मू-कश्मीर च बी जमीनी सतह तगर पुज्जै करदा ऐ। राजबन जिले च बी परेयाली ते बच्चें गी दुध पलेयाने आहली मौरी जननी सुरक्षा योजना थमां लाह हासल करै करदियां न जिनेंगी स्क्रीमै तैहत 6 जहार रपे दी रकम उपलब्ध कराई जंदी ऐ। एहदा लाह आंगनवाड़ी केंद्रें राएं लोकें तगर पुज्जदा ऐ जेदे नै महिलाएं लेई सतदार खुराक गभावस्ता दरान दिक्खभाल ते बच्चें दे जन्म दे बाद दी दिक्खभाल दी बवस्था यकीनी बनदी ऐ। इस स्क्रीम कन्नै जुड़ने लेई लाभार्थी गी आधारकार्ड, गर्भावस्था प्रमाण पत्र ते बैंक दी डिटेल जमा करोआनी होंदी ऐ। लाभार्थीएं दा इस स्क्रीम बरौ आखना ऐ।

<><><><><><>